

**SUA PKR: 6 aduan saja, kenapa riuh di luar?**  
**Malaysiakini.com**  
**November 09, 2010**

Setiausaha agung PKR Saifuddin Nasution Ismail berkata setakat ini hanya enam aduan rasmi diterima berhubung perjalanan pemilihan pimpinan tertinggi PKR.

Sekali gus, beliau menyisihkan dakwaan yang ditimbulkan daripada dua calon timbalan presiden, Datuk Zaid Ibrahim dan Mustaffa Kamil Ayub sebelum ini tentang jumlah aduan yang dianggap banyak.

"Di tengah hiruk pikuk ini, jawatankuasa pemilihan pusat hanya terima enam aduan secara rasmi.

"Kenapa masih riuh di luar sedangkan hanya enam aduan diterima," katanya dalam sidang media di ibu pejabat parti itu di Petaling Jaya petang ini.

Jelasnya, tiga daripada aduan tersebut masing-masing diterima dari Pulau Pinang, Kelantan dan Negeri Sembilan.

Saifuddin berkata, dua daripada aduan itu diterima daripada jentera kem Zaid manakala selebihnya daripada "individu lain" dalam parti itu.

"Yang lain itu berkaitan proses pemilihan di sebanyak 87 cabang yang sudah lakukan pemilihan (MPP)," katanya yang juga anggota parlimen Machang.

Tambahnya, aduan berkenaan termasuk satu dakwaan melibatkan "kata-mengata" yang dilakukan terhadap pemimpin parti.

Katanya, pemilihan juga akan tetap diteruskan di sebanyak lebih 100 cabang lagi.

Tambahnya, parti itu juga telah mengambil kira sebanyak enam daripada tujuh saranan yang dikemukakan Zaid dalam pemilihan kali ini.

"(Cuma) kertas undi telus cahaya kita tak buat sebab tak cukup duit," katanya lagi.